



Nanzlumz Saedcej Siujhag Gou

我难忘的小时光

Caet nyied, dwg aenndwen doxbiek. Cijdwg, giz mbouj doengz dwg, yienzlaiz gou dwg yawj bouxwnq biek hagdangz, biek gyoengq doengzhag lauxsae youq doxcaez haujlai bi haenx, hoeng seizneix, lwnz daengz gou yaek biek gyoengq doengzhag caeuq lauxsae lo.

Ngoenzneix dwg dou youq ndaw hagdangz ngoenz ceiq doeklaeng, gyoengq doengzhag cungj youq ndaw ban nyaengq sij vah louzniemh, yawj gyoengq doengzhag gij yienghsiengq sij mbouj ndaej doxbiek haenx, simcingz gou hix gig naekcaem.

Gou souh mbouj ndaej cungj ciengzmienh neix, byaij ok rog gyausiz bae. Gou fuz baenghlae, menhmenh

byaij roengz lae bae, baenghlae yienzbong gou roxnyinh gyoetgyat haenx, seizneix cix bienqbaenz gig raeujrub, gou byaij gig menh, gig mbaeu, dou lij dwg gyoengq lwnyiez baez roengzdangz couh youq gwnz lae buet hwnj buet roengz haenx lwi?

Geiq ndaej gaxgonq mbouj dwg yienghneix bw, moix baez hwnj lae roengz lae, dou cungj dwg sam boux haj boux baenz gyoengq youq gizneix buet hwnj buet roengz, cungj siengj boux daih' it buet ok gyausiz, daeuj-daengz gwnz cauhsangz guhcaemz guh' angq. Cigdaengz daj giz gyae yawjraen cizcouh lauxsae, dou cij lumj seizneix andingh roengzdaeu.

Daeujdaengz cauhsangz hagdangz, din gou couh gag dingz roengzdaeu. Lumh goufaex henz bakdou hagdangz, yawj aen cauhsangz sugsed haenx, gou cingq yawj dwk maezmwd, "gofaex hung neix ceiq hawj gou siengj hwnj doenghbaez lo" baengzyoux henzndang yaengyaeng

naeuz. Dwg ha, youq laj go faex neix, dou dohgvaq le cingjing roek bi ndwenngoenz.

Yawj aen cauhsangz hoengq-gvangq, gou siengj hwnj aen seizhah gak saek gak yiengh haenx, ngoenz haenx, hagdangz cingq gawjhengz gogenhcauh doxdax, ban dou vih baez doxdax neix, daihgya roengzrengz bae lienh. Roengzdangz lienh, cuengqhag le lienh, gyoengqdou youq gwnz cauhsangz mbouj rox doek le geijlai hanh ha, doeklaeng, ban dou ndaejdaengz daih' it mingz! Ngoenz haenx seizhaenx, gij riunyumj lauxsae, gou seizneix lij geiq ndaej cingcing cujcu; ngoenz haenx seizhaenx, gij angqriu angqhemq doengzhag lij rwenz youq henz rwz gou. "Gou caiq hix mbouj ndaej daeuj gizneix guhcaemz lo, caen mbouj siengj biek bae ha!" Dingq boux doengzhag gangj coenz vah lumj daej neix, raemxda gou hix aeng rim lwgda lo.

Cingq dwg seiz hwnjdangz,

seizneix cwnngyau cujyin byaij okdaeu, de yawjyawj dou, nanz ndaej riu le riu, gijmaz hix mbouj gangj, couh byaij dauqma lo, yawj baihlaeng de, gou bingzseiz miz di haemz de haenx, seizneix gingqyienz gamj-daengz gig caenciet.

Sing lingz cuengqhag yiengj lo, doengzhag ban iq aemq daehsaw cung okdaeu, yawj gyoengqde baenzneix angqyangz, gou miz di hozhaenz lo, ngoenzcog, gyoengqde lij ndaej lumj seizneix ityiengh angqyangz daeuj-daengz aen cauhsangz neix, hoeng gou.....

Roek bi, youq aen hagdangz neix, gou daj boux lwnyiez moengjdoengj, bienqbaenz boux lwnyiezhang roxsoq. Caiqraen lo, aen hagdangz gyaeunde gou! Caiqraen lo, ndwenngoenz siujhag nanzlumz gou! Gvaq haujlai bi le, mwngz itdingh baenz giz funghgingj ceiq gyaeunde ndawsim gou.

(roek nienzgaep Vangz Yen)

Mbouj Dan Dwg Boux Baengzyoux Dog

不是唯一的朋友

Youq ndawsim duzdouq, de gag nyinhnaeuz swheij dwg baengzyoux dog duz mwindaem.

Miz ngoenz ndeu, mwindaem lwnh duzdouq nyi: "Mwngz dwg baengzyoux ndei gou, hoeng mbouj dan dwg baengzyoux dog gou. Go faex neix hix dwg baengzyoux gou." Mwindaem nyeng ninz youq gwnz gofaex ngafaex hung ndeu, yawj dwk gwnzmbwn lamzoo.

"Hoeng gofaex mbouj rox byaij, mbouj rox gangj vah, mbouj rox riu youh mbouj rox daej, de baenzlawz sueng dwg baengzyoux mwngz ne?"

"Byawz naeuz baengzyoux

gou mbouj rox gangj vah, mbouj rox doengh ne?" Mwindaem youq gwnz faex fanndang mbat he naeuz, "Mwngz dingq——"

Seizhaenx miz raq rumz he ci gvaq.

"Mbawfaex mbouj cingq dwg ciengq go ha? Caiqgangj, ninz youq gwnz faex yawj aenmbwn lamzoo, gwnzmbwn bienq ndaej engq geizmiuq, aenmbwn hix baenz baengzyoux gou lo....."

"Yienghneix gangj, gou hix miz baengzyoux yienghneix." Biek duzmwi bae, youq gwnz loh, duzdouq gag siengj.

Duzdouq daeujdaengz ndaw

ndoengfaex gaiq dieg he, gizde miz diuz rij he lae gvaq, dieg sang maj miz go'nywj mwncupcup. Duzdouq ninz roengzdaeu, go'nywj mboujdanh sawj de ninz ndaej cwxcaih, youh soengq daeuj gij heiq homfwdfwd dem; raemxrij cingq ciengq go hawj de dingq, gwnzmbwn dujfwj cingq vih de byaujyenj mohsuz geizmiuq.....

"O, diegnywj, raemxrij caeuq gwnzmbwn cungj dwg baengzyoux gou." Duzdouq gyaez gij baengzyoux neix. Dangyienz de hix gyaez gofaex baengzyoux mwindaem haenx.

(Cangh Ciuhswngh)

Seizhah Daeuj Lo

夏天来了

Seizcin gipgip muengz-muengz byaij bae lo, daengx dieg dipva hoengzmaeq siengsim ninz youq gwnz dieg, lumj boux yenjyenj youq gwnz daiz byaujyenj sat cezmuiz roengz daiz nei, cingq youq mwh bouxyawj satmuengh, lingh boux yenjyenj daenj buhheu byaij hwnj daiz daeuj, sawj bouxyawj youh sim'angq lo! Mwngz yawj gwnz faex lwgmak lumj ribfwngz baenzhaenx hung lo, lumj lwnyiez baenzhaenx dwg-gyaez! Mbawfaex ciemhciemh heu

doh daengx gofaex, sien dwg heuoiq, ciepdwk heusau, ciengz fwn he, aeu mbawfaex swiq ndaej engq heu lo, heu ndaej lwenqda!

Geij ngoenz seizgan, daihdeih cungj vuenh hwnj buhheu lo! Dienheiq ciemhciemh ndat lo, mwngz yawj lwnyiez cungj daenj hwnj buhgending lo! Yienznaeuz saekmaeq myox lo, hoeng saekheu daj boiqgiek bienqbaenz cawj-giek. Seizcin dwggyaez, seizhah doengzyiengh hawj vunz gyaez de!

Va'ngaeux gyaeunde couh



yaek youq seizhah hai lo! Mbawngaeux luenzlu dak dwk va-ngaeux hoengzmaeq, haenx dwg geijlai gyaeunde ha!

Seizhah daeuj lo, gou gyaez seizhah!

(sam nienzgaep Cangh Yigiz)



Gou Hag Rox Ndaem Byaek

我学会种菜

Ngoenzneix ndit ronghndei, gou yawjraen daxgoeng youq ndaw suen-byaek nyaengq mbouj dingz, gou buet gvaqbae cam daxgoeng cingq guh gijmaz?

Daxgoeng naeuz: "Gou cingq ndaem byaek ha!" Gou angq dwk naeuz: "Daxgoeng, gou bang mwngz ndei lwi?"

Daxgoeng naeuz: "Daiq ndei lo, nanz ndaej mwngz mbouj lau uq, caen dwg boux lwnyiez roxsoq ndeu."

Gou bang daxgoeng ndaem le haujlai byaek, miz byaekhau, lauxbaeg, makyungz daengjdaengj. Daxgoeng naeuz: "Byaek ndaem le geiq ndaej guh gienh saeh ceiq youqgaenj couhdwg rwed raemx, raemx mbouj ndaej rwed lai, hix mbouj ndaej rwed noix, mboujne go'byaek couh maj mbouj ndei."

Ngoengz daihngieh gyanghaet, gou bae daengz suenbyaek, ha, gvaq hwnz ndeu go'byaek cungj daengj soh aenndang lo, gyoengqde cingq caj daengngoengz daxgoeng okdaeu ne. Yawj go'byaek maj ndaej baenzneix ndei, ndawsim gou diemzsisi.

(ngeih nienzgaep Liengz Cihih)